

Tan Sri Arshad Ayub, Khalidah Adibah Amin Dianugerah Tokoh Melayu Terbilang Umno 2012
Bernama
12 Mei, 2012

KUALA LUMPUR, 12 Mei (Bernama) -- Tan Sri Arshad Ayub dan Khalidah Adibah Amin dianugerahkan Tokoh Melayu Terbilang Umno 2012 pada sambutan ulang tahun ke-66 Umno di Stadium Nasional Bukit Jalil Jumaat malam.

Anugerah itu, yang disampaikan Perdana Menteri Datuk Seri Najib Tun Razak yang juga Presiden Umno, sebagai menghargai sumbangan mereka kepada negara dan parti.

Arshad, 84, merupakan Pro-Canselor Universiti Teknologi Mara (UiTM) terharu dan bersyukur menerima anugerah itu serta berharap orang Melayu tidak bersikap seperti kacang lupakan kulit kerana Umno sudah banyak berkorban masa dan tenaga untuk kepentingan rakyat dan negara.

"Sehingga hari ini, saya belum jumpa bukti parti Melayu lain yang boleh menerajui negara seperti Umno," katanya ketika ditemui pemberita.

Arshad yang masih aktif sebagai seorang pentadbir, khususnya dalam dunia korporat dan pendidikan, merupakan antara pelopor dalam pembangunan UiTM serta menjadi pengarah pertamanya pada 1967 hingga 1975.

Khalidah Adibah, 76, pula diiktiraf Tokoh Melayu Terbilang Umno kerana sumbangan beliau terhadap ketamadunan ilmu persuratan, kesusasteraan dan bahasa.

Anak kepada pejuang kemerdekaan Tan Sri Zainon Sulaiman atau Ibu Zain itu amat prihatin dalam mengangkat latar hidup masyarakat ke dunia penulisan.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=665621>